



Te Toa Takitini

Registered at the G.P.O. as a Newspaper.

Nama 72.

HASTINGS.

Akwhata, 1927.

TE INOI A TE ROPU O NGA WHAEA.

MOTHERS' UNION PRAYER.

E Ihewa, ringihia mai tou Wairua Tapu ki runga ki a matou, kia u aē to matou whakapono ki a Ihu Karaiti, kia whakapana hoki o matou ngakau ki te aroha ki a Ia. Awhinatia mai matou kia meinga ai matou hei hoa pono mo a matou tane, hei whaea aroha ki a matou tamariki. Whakaakona matou e Koe, kia tika ai ta matou whakatipu ake i a matou tamariki mo te rangi. Tukuna iho tou Wairua Tapu ki a matou tane, ki a matou tamariki. Meinga o matou kainga hei waahi e tau ai tau rangimare me tou aroha. Whakaakona matou ki te mahi tika i tenei ao, kia noho tonu ai matou ki a koe i tou kainga i te Rangi; Ko Ihu Karaiti hoki to matou Ariki. Amine.

WHARE-KARAKIA MO HUKARERE.

TE KOHI HOU.

Na nga wahine o Nuhaka	...	£22 0 5
Te whakatoputanga	...	£788 17 11

Ko te moni kohi a nga Misses Bulstrode e £50 a tetahi a tetahi. Ka hui ai £100 ta raua. E he te £58 o te pepa o Hurae.

HINOTA O WAIAPU.

Hei te ra whakamutunga o Hepetema, ka tu te Hinota e te Pihopatanga o Waiapu ki Nepia.



He mea Panui e Rev. F. A. Bennett, he mea ta e te Herald Office, Tennyson Street, Napier, H.B.

TE TOA TAKITINI.

Te Utu mo te Pepa 10/- i te tau.

Me penei nga reta "Te Toa Takitini," Box 300, Hastings.

628

TE TOA TAKITINI

Akūhata, 1927

TA APIRANA TURUPA NGATA. TE WHAKANUI A NGATI-POROU.

Abakoa te kino o te ra, te waipuke o Waiapu, he nui te tangata i huihui ki Wai-o-Matatini i te 12 o nga ra Hune, ki te whakanui i Apirana Ngata, mo te honore kua uhia nei e te Kingi ki a ia. Na Pene Heihi nga kupu tuatahi ki nga ope whakaeke. I puta i a ia nga ingoa o Mokema Kohere raua ko Rapata Wahawaha, he tangata i u pono ki te torona o Ingarangi, a ko te honore kua potaea kua Apirana kei runga tonu i taua tauhu o te piri-pono o Ngati-Porou. I muri atu i a Pene Heihi ko Apirana. I powhiri ia i a Ngati-Porou a i whakamarumaru hoki i muri tata iho o te whawhai ka whakaaria mai ki a ia te ingoa Ta, otira kaore ia i tango i tona mahara tika ke taua honore mo te hoia chara mona mo te noho kainga. I te taenga mai o te Tiuka ki Rotorua ka whakaaria mai ano taua taonga ki a ia, a kaore ia i whakaae. No te tohe rawa a te Kawana kia whakaae ia i tango ai tona ringa ki tenei taonga nui, engari tera te arero Maori e tauhou ki te ingoa hou, na reira me waiho atu ma te pakeha taua ingoa e whakahuahua.

Ko Renata Tamepo o nga ope whakaeke tuatahi ki te ta. I mea ia abakoa kaere nga honore pakeha i pirangitia e o ratou rangatira, he no hou tenei, e tika ana kia whakanui te iwi ki te Ta hou ki te Reiri hou.

I whakaae a Reweti Kohere ki te kupu a Renata Tamepo kaore nga rangatira Maori o mua i whai ki nga taitara o te pakeha me Te Kani-a-Takirau i whakahawea ra ki te ingoa kingi, a i te mea e utua ana ki te moni nga taitara o Ingarangi kua ruarua tona ngakau ki nga taitara pakeha, otira ko te whakahonoretanga i Apirana he tino tika, kotahi rawa te he he tomuri. Ka 22 nga tau i tu ai Apirana hei mema mo te Paremata, i rapu ai ia i te ora mo te Iwi Maori, a ko ia tonu tetahi o nga tangata nunui o te Paremata. He tangata whakaiki Apirana, e kore ia e rere ko; abakoa Ta, Kingi ranei ko taua ahua tonu.

Mo nga kupu a Pene Heihi mo te piri-pono, i ki a Reweti Kohere, kei te tangi tona ngakau ki te Iwi Maori. Kua kite ia ko te mutunga o te nuinga o te Iwi Maori hei "tata rakau, hei utuutu wai" ma te pakeha—ara hei pononga. No enei ra kei te uiui tona ngakau me he mea he tika te rerenga o tona tipuna ki te taha pakeha whawhai mai ai ki te Maori. Engari ra he tino waimarie a Ngati-Porou i te piri-ponotanga o Mokema Kohere raua ko Rapata Wahawaha, na konei hoki i kore ai i murua nga

whenua o Ngati-Porou. Kua tu te Komihana uiui mo nga whenua raupatu, hei mahi noa pea.

I puta ano he kupu whakamihī ma Reweti Kohere mo Arihia Ngata mo te tangata hapai i Apirana i ana mahi nunui, na reira he tino tika te taunga o te ingoa Reiri ki a ia.

He tikanga na etahi nupepa pakeha te anuamu ina potaea te ingoa Ta ki etahi tangata otira kotahi tonu te reo o nga nupepa katoa he whakamihī anake, ano ko te honore ke kei te whakahonoretia e te kai-manu i te honore.

I whakamihī ano a Eruera Moeke ki Apirana mo ana mahi nunui. Ko te mahi tuatahi a Apirana ko te umu i nga whenua o Ngati-Porou ki waho a nga mahi kamupene. I paraparā katoa hoki nga rangatira i te tukunga i nga whenua ki te kamupene. Na Apirana i whawhai ka ora nga whenua o Ngati-Porou. I te auhunga o te korero a Eruera ka tapaea he moni ki Arihia, he whakaaro na te iwi mo te ra o tona Reiritanga. I whai kupu ano a Hatara te Awarau, a Nehu Kopuka, a Pamikena Kaa me Cooke, he pakeha.

He tino nui nga waea me nga reta ki Apirana, o Nui Tirani o waho atu hoki, he whakamihī mo te honore kua ulia nei ki a ia. He tino pai nga korero o ana waea o ana pukapuka mo Apirana mo te Iwi Maori. Kia Ora ra te Ta hou me te Reiri hou!

—Na PUKEMAIRE.

WIREMU EREATARA RANGIHORU.

I roto i nga aitua maha o Te Arawa i tenei tau ko tetahi o nga tangata rangatira, tangata whai-mana, pu-korero hoki i roto i nga hui nunui o te Arawa ko Wiremu Ereatara, tenei ka takoto nei i te moenga roa o ana matua. He tangata tenei i whakaaro nuihia e ona hapu maha i roto i a Te Arawa, he tangata maraia hoki ki te whakatakoto tikanga. Ko ia hoki te teputi-tiamana o te Poari Tiaki o te Takiwa o te Arawa. He kai-hapai ano hoki ia no nga tikanga o te whakapono, me tana mamaaki pai i nga tikanga o te Hahi a tae noa ki tona matenga. I a ia e tamariki ana i akona patia ia e nga kaumatua ki nga korero tawhito, tae noa ki nga whakapapa a te iwi Maori. Ka ngaro nei tenei o nga kai-hautu o te waka nei o Te Arawa.

Haere ra e koro! Ka mahue nei to waka, ma wai ra e hautu i roto i nga marangai i muri i a kee! Haere ki te iwi, haere ki te kainga, haere ki te Ariki.

REV. HONE TERI PAERATA.

No te 28 o nga ra o Hurae ka moe a Rev. Teri Paerata. I mate atu ia ki Pokitane (Foxton). Ko ona tau 68. He kaumatua rangatira tenei i roto i ona hapu i a Ngati Tuwharetoa, i a Ngati Raukawa.

I kurangia ia ki Te Raukahikatea Kareti i Turanga. No te tau 1894 ka whakapangia ia hei Rikona, no te tau 1901 ka whakapangia hei Piriti. E 33 ana tau e tu ana hei Minita.

I timata atu tana mahi Mimita i Otaki i te tau 1894. I muri mai ka hikitia ki Wairarapa, a no muri rawa mai, ka noho ki Pokitane.

He kaumatua ngawari a Teri he hohonu hoki tona mataauranga ki nga whakahaere me nga tikanga Maori. I pono tonu tana hapa i nga tikanga o te Hahi, a moe noa ona kanohi.

Haere ra te pononga a te Atua. Haere ki tou okiokitanga. Haere ki to tatou Ariki. Kei te tangi matou o hoa pononga mo to timana ka ngaro nei, engari kei te hari mo to wairua ka haere tika atu ki te Rangi, ki nga manaakitanga mo te hunga i u tonu ki a Ia.

HUI TUARUA A TE KOMITI TUMUAKI. ATIRIKONATANGA O TAURANGA.

No te Wenerei te 13 o nga ra o Hurae i te 10.30 a.m. ka puare te Hui.

Nga Memu me nga Mimita i tae mai.

Na ingoa.

Wiremu Kingi; Rev. Mohi Eruini	Takiwa. Ohinemutu.
Tiakiawa Tahuriorangi, Rainona Here- taunga., Rev. Te Manihera Tamatahi	Whakarewarewa and Mourea
Hemi te Uara, Rev. Rewi Wikiriwhi	Te Puke
Paora Rangiaaho, Rev. Te Ropere-Tahu-riorangi	Ruatoki.
Kereopa Hokire, Rev. Te Waaka	Whakatane.
Rev. Paora te Mueru	Taupo.

Ko Paora Rokino o Taupo Kaore i tae mai. He mate no taua hea-wahine.

Tiamana o te Hui ko Atirikona Tiatitene.

HE MEA TIMATA KI TE INOI.

Te Tiamana:—E patai ana ki nga mahi kua kaupapa i te komiti te whakarite.

Wiremu Kingi:—Kua oti nga mahi i whakahaerea e te komiti hai mahinga ma tenei huinga o te Komiti Tumuaiki haunga nga take e puta ake i te wa e whakahaere ana te Hui.

Ka panuitia e te Hekeretari nga mahi o te Hui tuatahi.

NGA TAKE.

KA PAAHITIA.

Ka whakaaria nga take hai mahi ma te Komiti

1. Nga moni e takoto nama ana ki nga Paraha.
2. Nga huarahi mahi hai whakaea i ana Nama
3. Te £70 hai hora i te Rongopai.
4. Mo te 10 eka me te whare o te Kaitirotiro.
5. Nga moni me nga whakahaere onga whenua a te Hahi.
 - (a) Wharekaahu i Maketu.
 - (b) Kainga o te Hahi i Tauranga. Tauranga.
 - (c) Opouriao. Ruatoki.
6. Te Ngae, me te moni reti hai oranga Mimita.

7. Nga Ripoota o nga mahi o nga Pariha.

8. Whakahaere Mihana ma Rev. P. A. Peneti.

Wiremu Kingi:—E whakaari ake ana ahau ko te take o nga moni e takoto nama ana i nga pariha ha take tuatahi.

Whakaaetia ana.

Tiakiawa:—He patai mehemeca pehea te wawabanga o te moni £12 ki nga Kainga o te Whakarewarewa, o Owihata te Ngae me Mourea.

Tiamana:—Kai nga tangata tonu o ana Kainga te Tikanga.

NGA NAMA O NGA PARIHA.

He roa te whakamarama a Wiremu Kingi mo tenei take kei runga i te takoto awangawanga o te nu'unga ki te Tikanga o nga nama nei i waiho ai hai maharohara ma etahi tangata waiho tonu iho hei huarahi e tino wehe atu ai i te Hahi ki era atu Hahi, waiho ana hai mate mo etahi waahi o te Hahi, ka tokoiti hai hapai i nga mahi a te Hahi, no reira me tonu ano ki te Hinota kia whakamaramatia ano nga nama nei haunga to Ohinemutu kai te marumua tena—mehemeca ka kitea tera e taea me whakakore atu etahi o enei nama.

Tiamana:—Kai te kitea tena ahua mate o etahi o nga Pariha penei me Whakatane, me Ruatoki me te Puke me Mourea hoki. Na runga i taua ahua ka atu haere tonu te Komiti Tumuaki i Nepia i nga orunga o nga minita na wai ra ka eke ki te £2000 pauna te moni ki te Peeke e tangohia ana mai hai whakarite i tera taha.

Mo te tono kia whakakoreca etahi o enei nama e te Hinota, kia au me whakaputa tatau i to tatau na kaha i te tuatahi ki te whakaea kia kitea mai ai ano kei te whakaputa tatau i to tatau kaha ki reira ka whakaaro ai te ahua mo enei nama.

He tokomaha i korero mo tenei take.

I. Nga nama o nga Pariha.

Na Wiremu Kingi i motini na te Waaka i tautoko—kia atu kawea ano nga nama nei ki te Hinota i Nepia atu uirui ai, kia whakamaramatia mai hoki.

A me whakaputa ano tenei Atirikona tanga i te kaha ki te whakaea i enei nama ahakoa ekitea ana he tino Kawenga tau-maha rawa tenei ma te Hahi Maori o tenei takiwa.

Whakaaetia ana.

II. Nga Huarahi Whakaea i nga nama.

Te Tiamana ka whakamarama i te whakahaere a whare-pukapuka (Duplex Envelopes) tino roa tana whakamarama mo te whakahaere.

He tokomaha i tautoko i tenei whakahaere hai mahi ki nga Pariha.

Whakabaere Wharepukapuka kia tangohia e nga Pariha o te Atirikonatanga o Tauranga.

(a) Na Heemi te Uara i motini na Te Waaka i tautoko:—E whakaae ana tenei huinga o te Komiti Tumuaki o te Atirikona-tanga o Tauranga kia whakapangia tenei whakahaere kahi moni a whare-pukapuka ki nga Pariha o tenei Atirikonatanga.

Whakaaetia ana

Timatanga whakahaere mo aua wharepukapuka.

(b) Na te Ropere i motini na Paora Rangiaaho i tautoko me timata te whakahaere o enei wharepukapuka i nga Pariha o Rotorua. Whakaaetia ana.

III. Nga mahi o nga Pariha.

Na Mohi i motini na te Manihera i tautoko kia whakatakorua mai e ia minita nga mahi o tona pariha o tona pariha ki te aroaro o te Hui a te Komiti Tumuaki ina tu te Hui i nga wa e Karangatia ana ratau; a ko te ahua o nga mahi hai Kawenga mai ki te Hui ma te Tiamana e whakatakoto a-patai ki ia minita ki ia minita i mua mai o te ra e hui ai. Whakaaetia ana.

IV. Mo te 10 Eka.

Tiamana:—Kaore he mana o tenei Komiti ki runga o tenei 10 Eka kei te Komiti mui i Nepia anake te whakahaere.

V. Mihana ki Tauranga me era atu waahi.

Na Wiremu Kingi i motini na Rewi i tautoko:—
Kia whakahaerea ano te mahi mihana a Rev. P. A. Peneti, hai whakaoho i te Rongopai i te takiwa o Tauranga. Whakaaetia ana.

VI. Moni Hora i te Rongopai e £70.

Na Mohi i motini na Paora Rangiaaho i tautoko:—
Ko nga moni ma ia Pariha mo te hora i te Rongopai me tuku mai ki te Tiamana o te Komiti Tumuaki, a me rite tenei moni i te tau e haere nei. Whakaaetia ana.

Mo te Pariha o Rotorua.

Wiremu Kingi:—I runga i te titiro taumaha ki nga whakahaere o tenei Pariha i te titiro hoki ki te tokomaha rawa o nga tangata o te Hahi o tenei Pariha, ka whakaaro matau te Komiti o te Hahi o Ohinemutu kia wahia kia rua wahanga o tenei Pariha.

(1) **Ohinemutu**—Waitete. Te Awahou me te Mamaku.

(2) **Whakarewarewa**—Ki Mourea.

Ko nga moni reti o te Ngaie me waiho atu mo te wahanga No. 2. Ki te whakaaro ma konei ka kaha ai nga mahi.

Tiamana:—Kai te pai tenei whakaaro mehemea kai te pai hoki nga tangata o Ohinemutu, engari ma te Hinota ano e whakataatu tenei take.

Wiremu Kingi:—Kai te paingia tenei tikanga engari kia iti nei te moni o te Ngaie e wehe mai mo Ohinemutu kia £10.

VII. Pariha o Rotorua kia wahia kia rua wahanga.

Na Raimona i motini na Tiakiawa i tautoko:—

E whakaae ana tenei Huinga o te Komiti Tumuaki kia wahia te Pariha Rotorua kia rua wahanga.

(1) Ohinemutu ki te Mamaku.

(2) Whakarewarewa ki Mourea.

Ko te moni Reti o Te Ngaie me waiho mo te Pariha No. 2. Paahitia ana.

VIII. Ingoa mo te Pariha No. 2.

Na Tiakiawa i motini na Raimona i tautoko:—

Ka pa te mate ki te tamariki whangaia ki te **Woods' Great Peppermint Cure.**

Ko te ingoa mo te Pariha hou—ko te Ngae—nga take i tika ai—(1) E puta ana mai i te ngae he oranga mo te Pariha. (2) Ko waenga nui tena o te Pariha. Whakaaetia ana.

IX. Tetahi wahi o te moni o te Ngae mo Ohinemutu.

Na Tiakiawa i motini na Raimona i tautoko kia £23 o te moni o te Ngae mo te Pariha o Ohinemutu.

Whakaaetia ana.

X. Mema mo te Puke ki roto i te Komiti Tumuaki.

Na Rewi i motini na te Uara i tautoko:—

Kia whakaaetia ano e tenei Huinga o te Komiti, tetahi mema ano mo te takiwa o Rauguru ara mo te Puke ki roto o te Komiti Tumuaki.

Whakaaetia ana.

Tiamana:—Ko te whakatuturutanga o tenei mema na te Komiti Nui i Nepia e whakaae mai.

Mo nga Karakia ki Murupara.

I runga i te patai a te Tiamana e pehea ana nga whakahaere karakia ki Murupara. Ka whakamarama a te Māhiora kai nga marama e 5 nga Ratapu ka tae ia i te Ratapu mutunga, a i tetahi marama pera ano nga Ratapu ko te Rotoiti ia (Alternately)

XI. Nga Whenua a te Hahi.

Na te Uara i motini na Paora Raughdio i tautoko:—

Kia riro ma nga mangai Reimana me nga mimita e tae ki te Hui a te Hinota ka tu ki Nepia e uui te ahua o nga moni me nga whakahaere o nga whenua a te Hahi.

Wharekahu

i Maketu

Tauranga (te Kainga, etc.)

i Tauranga

Pouriao

i Ruatoki

Whakaaetia ana.

XIII. Mihi ki te iwi Kainga.

He nui te mihi a nga mema me te Tiamana ki te pai o te manaaki a te huinga Kainga i nga mema o te Komiti, me te tumanaoko hoki kia tau kia ratou nga manaakitanga maha.

XIII. Mihi ki te Tiamana.

Na Wiremu Kingi i motini na te Waaka i tautoko. Kia puta he mihi ma tenei huinga o nga mema o te Komiti Tumuaki mo te kaha o te Tiamana i tona mate nui, i pa nei ki a ia, me tena kaha hoki i tae mai ai ia ki tenei huinga.

Whakaaetia ana.

Tiamana:—Kupu whakaboki potu i te mihi—me te whakapai ki nga whakahaere o te Hui—a te Komiti Tumuaki.

He mea whakamutu te hui ki te inoi.

RAIMONA HERETAUNGA.

Hekeretari.

KOMITI TUMUAKI.

ATIRIKONATANGA O HAKI PEI.

I tu te hui tuarua a tenei peka o nga Komiti Tumuaki a te hahi ki te tari o te Pihopataunga i Nepia i te 10 o nga huora i te ata o te Wenerai te 20 o nga ra o Hurae, 1927.

Ko nga mema enei i tae mai:—

Nga Minita :

Atirikona Brocklehurst. Tiamana.
 Rev. Wipere Mataira o Nuhaka.
 Rev. Peni Hakiwai o Moteo.
 Rev. Wharetini Rangi o Waipawa.
 Rev. P. Peneti. Kai tiroiro o Te Waipatu.

Nga Reimana :

Matene Whaanga o Nuhaka.
 Pita Tiopira o Moteo.
 Henare Hutana o Waipawa.
 Paraire Tomoana o Te Waipatu.
 Rewi Tamihana o Te Wairoa.

I whakapuaretia te hui e te Tiamana ki te kupu inoi.

I panuitia e te Hekeretari nga meneti o te hui tuatahi o te Komiti. Paahititia ana.

Ko nga take enei i whakahaeretia:—

1. Hora i te Rongopai.

I whakaatu te kai-tiaki moni ko nga moni i kohia e nga pariha Maori o tenei Atirikonatanga mo te kawe i te Rongopai ki nga iwi o te ao kei te pouritanga e noho ana. e 21—17—1.

	£	s.	d.
No Porangahau	14	10	0
No Waipawa	4	10	1
No Te Waipatu	1	6	0
No Nuhaka	1	11	0
	£21	17	1

I whakaaturia te uaua o te kitea o te moni i tenei tau mo nga take ake o te Pariha, kaore i eke te moni i whakaarotia ai. Ko te Pariha anake o Waipawa (tae atu ki Porangahau) i whai whakaaro mo tenei take.

2. Duplex Envelope System. Kohi whare-pukapuka.

I whakaatu te tiamana kua tae mai nga whare-pukapuka me nga whakamarama. He nui nga patapatai ki te tiamana mo te ahua o te whakahaere, me te marama ano hoki o nga whakahoki. Ko te utu mo nga pukapuka, me nga whare 100, e £5.

Whakaritea ana me whakahaere taua tikanga ki nga Pariha o Waipawa, o Moteo, o Te Waipatu, o Nuhaka.

I whakamaramatia ko te kaupapa pai o tenei ahua kahi ko te ako i te tangata ki te kahi mo nga mahi a te Atua i ia wiki, i ia wiki, ahakoa karakia, kore karakia ranei. Tuarua, ko te atu wehe i tana kahi mehemea ki te pera tana whakaaro, mo nga take o te pariha tetahi wahi, mo te hora i te Rongopai tetahi wahi. Kei te tangata tonu te whakaaro mo te iti, mo te rahi, ki tetahi take, ki tetahi take.

Na Peneti te motini, na W. Rangi i tautoko:—

“Kia timatatia maianei te whakahaere kahi a-pukapuka ki o tatou pariha Maori, a ko nga bekeretari enei hei whakahaere i taua take”:

Mo te mare kaore he rongoa hei rite ki te **Wood's Great Peppermint Cure.**

Pariha o Waipawa, H. Hutana.
 Pariha o Moteco, Pita Topira.
 Pariha o Te Waipatu, P. H. Tomoana.
 Pariha o Nuhaka, Peta Nepia.

Whakaaetia ana.

I whakaritea kia 50 nga whare-pukapuka hei tango mai mo ia Pariha.

3. Whare-minita mo te Pariha o Waipawa.

(a) I whakaaturia e H. Hutana te pukapuka o te peeke i takoto ai nga moni, a kitea ana kua tae te moni inaianei ki te £435.

I puta he mihi ma te Tiamana mo te kaha o nga tangata o tenei Pariha ki te whakahaere i tenei take.

(b) Mo te tono kia awhinatia atu tenei take e te Tari, i whakaatu te Tiamana, kaore he moni takoto noa a te Tari inaianei, engari hei te wa e whiwhi moni ai te Tari, tera e whai-whakaarotia tenei take. Kia hoki nui te Pihopa ka tono ai ki a ia kia awhinatia koutou. Waiho ma Peneti raua ko te Tiamana e whakatakoto tenei take ki te Komiti Tumuaki o te Pihopatanga.

(c) Mo te wahi hei tuunga mo te whare na H. Hutana te motini, na Paraire Tomoana i tautoko. "Me whakatuturu ko Porangahau te kainga hei tuunga mo te whare-minita."

Paahitia ana.

I runga i nga whakamarama ka puta enei take: He nui ke te kaute o nga Maori o Porangahau i etahi atu kainga o te Pariha o Waipawa. I te mea kei te mau tonu nga whenua o Porangahau ki nga Maori, tera e nui tonu te noho a te Maori ki reira.

Ko te tuunga mo te whare i arohatia mai nei e Mrs. Hutana, kua oti te wehe e te kooti, a ko taua wahi kei roto tonu i te faone o Porangahau. Noreira, kaore e maua te hoko atu o tera wahi mehemea ka kitea a nga tau e takoto mai nei kei te he a Porangahau hei nohanga mo te Minita.

(d) Nga Ohaoha o te whare-karakia.

I whakaatu te Tiamana, ko nga moni e kohikohia ana i roto i nga karakatanga, e tapaea ana mo te oranga Minita. He ture tawhito tenei no te Hahi, a kei te pera katoa hoki nga Pariha pakelha, me nga pariha Maori. Ko te hiahia o te Tari kia whakamarama te motini i paahitia e tetahi o nga Hinota Maori, kia tukuna kateatia mai nga ohaoha i ia marauna i ia marauna ki te Tari o te Pihopatanga-i Nepia. I whakamaramatia kei te takoto wehe katoa nga kaute o ia Pariha, o ia Pariha, a ko nga moni katoa e tukuna mai ana ki te Tari, ka whakapaua ki te Pariha nana i tuku mai, kaore ki etahi atu wahi.

4. Nga nama a nga Pariha.

He roa te wa e whakahaere ana i nga kaute o ia Pariha o ia Pariha, kitea ana kamui te tauwaha i tenei tau.

I whakaatu a H. Hutana, i te hui i tu ki Waipawa i tono nga tangata kia whakapaua nga moni kei reira e takoto ana, hei whakaora i te whare-karakia. I runga i nga whakamarama, paahitia ana te motini e mau ake nei:—

"E whakaae ana tenei hui kia whakatuturufia te take o te hui o Waipawa, ara kia whakapaua nga moni i kohia i mua atu o te 31 o nga ra o Maehe o te tau nei, hei whakaora mo nga

whare-karakia i Waipawa, i Takapau, i Porangahau. E whakaiae ana tenei hui, ko nga moni obaoha katoa o tenei tau, timata atu i te 1 o nga ra o Aperira, me tuku katoa mai ki te Tari i ia marama, i ia marama."

Whakaritea ana ma Peneti tenei take, me etahi atu take e pa ana ki te Hahi, e whakamarama ki nga tangata o Porangahau a te wa e tae ai ia ki reira.

5. Te Taima-tepara o nga karakia.

No tenei hui ka tukuna atu ki te Tari te rarangi whakahaere o nga karakia o ia pariha, me nga karakia tango hapa o tena wahi o tena wahi.

6. Kai-tiaki moni.

I whakamarama a Peneti, kaore te motini o tera hui i whakahaeretia i te marama o te tono a Hori Tupaea, kia waiho noa iho taua take, kei pa he manaa ki waenganui i a tatou, me etahi o tatou ka wehe nei ia tatou. Kei te ngawari haere te tangata, kia ngawari hoki tatou.

7. Nga Himene Hou.

I whakaatu a Peneti kei te koha etahi himene hou, kei te whakamaoritia hoki etahi. Kei te hiahia tenei komiti kia tukuna mai e nga tangata o te Hahi, ahakoa Mimita, Reimana ranei, a ratou na himene hou i kite ai, i whakamaori ai ranei. Me tuku mai ki Te Etita o Te Toa Takitini, Box 300, Hastings.

8. Te Himene me te Music.

Kaore ano he ripoata kia tae mai. I whakaritea kia tuhituhi a Peneti ki te Pihopa kia uia e ia ki nga kai-perchi te utu mo te music.

9. Karakia Whakauru ki te Hahi.

Kaore ano kia tae mai te ripoata a Atirikona Hapata Wiremu.

10. Nga Mihi.

I panuitia nga reta i tukuna e te Hekeretari me nga utu mai a Te Pihopa, a Atirikona Tiatetene, a Mrs. Pilson.

11. Reta a te Pihopa.

I whakamaoritia e te Hekeretari nga kupu a te Pihopa i ana reta e rua i tuku mai ai i Ingarangi, ara ana mihi ki nga Maori o tona Pihopatanga, me tona whakawhetai mai ki te Komiti mo nga mihi atu ki a raua ko tona hoa, me tana whakaatu mai kua pai haere te mate o tona hoa.

12. Rehita i nga Whanautanga me nga matenga. -

I whakaatu a Peneti ko te ture Kawanautanga e whakahaui ana kia rehitatia nga tamariki katoa e whanau noa ana, kia rehitatia hoki nga tupapaku. Haunga ta te Hahi rehita, kei te marama hoki tera, engari ko te rehita a te Kawanautanga ki te Kai-rehita. Ko te ture Rehita mo nga Maori, no te tau 1913 i Kahititia ai. Ko nga tangata e tika ana hei whakaatu i te matenga ki te Rehita, ko tetahi mema Kaunihera Maori, ko te Mimita, ko tetahi tangata ranei e marama ana te whakaatu ki te Kai-rehita.

Mo nga whanautanga, ko nga tangata e tika ana hei whakaatu, ko te papa ko te whaea ranei, he tangata ranei i taua whare e noho ana, ko te Mimita, ko tetahi mema Kaunihera ranei.

Me rehita nga whanautanga, me nga matenga i roto i te rua marama i muri iho i te whanautanga, i te matenga ranei

Ko te whiu mo te kore e rehitā e £2 mo te haranga tuatahi, e £5 mo nga haranga i muri atu.

He Kai-rehita Kawamatanga nga Kai-whakaako o nga kura Maori.

Ahakoā kaore ano tatou kia akina nuitia e te ture rehitā, tena pea tona wa kei te haere mai e whainatia ai tatou. Noreira he tikanga tenei e tika ana kia whakamaharatia ki a tatou katoa, kei rokohanga mai tatou e te hoa-riri e moe tonu ana.

13. Nga kaute o nga Pariha mo te Hinota.

I whakamaharatia nga mema o nga Pariha, kia whakakiiā nga "returns" mo te wa o te Hinota. Hei te Paraire te 30 o nga ra o Hēpetema ka tu te Hinota ki Nepia.

14. Nga pukapuka kaute mo te Hinota.

I whakaatu a Peneti kaore i te tino hangai nga pukapuka kaute mo nga Pariha Maori. Kei te wehe tonu nga kainga tae noa ki nga hapu o te Pariha kotahi. Me nga moni o ia kainga, me nga kai-tiaki kei te wehe. Pahitia ana te motini: Kia whakaritea he komiti mo tenei take. Ko nga mema mo taua komiti ko te Tiamana me Mr. Pilson ko Rev. Hakiwai me Peneti, ko Tiopira me Tomoana, a me whai mana tenei komiti ki te whakahaere i tenei take a te wa e whakaarotoa ai e ratou.

15. Te Rehita Tianara.

I whakaatu a Peneti kua tae mai te reta a te Rehita-tianara o Poneke, he whakamahara mai ki nga Minita Maori kia tukuna atu nga kape o ia marena o ia marena ki tona tari i Poneke. He taumaha te whiu mo te takahi a te Minita i tenei ture o te Koroni katoa. Ko te kape me tuku tonu atu i muri tonu iho o te marena.

1.6 Te Hui a muri nei.

I whakamarama te Tiamana ko te hui a muri nei, he hui topu mo nga Komiti Tumuaki katoa o te Pihopatanga. Ka tu taua hui ki Nepia a te wa o te Hinota, i te Turu te 1 o nga ra o Oketopa.

17. Rehita i nga mema o te Hahi.

I motinihia e P. H. Tomoana na Tiopira i tautoko: Kia rehitatia nga tangata e kiiā ana no te Hahi o Ingarangi, i ia Pariha kia mohiotia ai te fokomaha kei tena wahi, kei tena wahi. Pahitia ana.

I whakamaramatia ma tenei tikanga ka maha ai te tukutuku haere i nga wharepukapuka mo nga kohi, me te kaute o nga tangata o ia Pariha hei whakarite i nga raruraru, ara expenses.

1.8 Mihana.

I whakaatu a Peneti, kei roto te Hahi Maori i te mura o te ahi i tenei wa, i te nui o nga tangata i pakaru nei ki waho, me te tokoiti o nga moreha i mahue hei hauu i nga tikanga mumu o te Hahi. Kei nga wa maha o te tangata, kamui tana biahia ki te whakarongo korero mo nga huahua o te ora mona. Pera ano te taha wairua. He wa pai tenei hei huihuinga mo tatou mo nga Minita ka torotoro haere ai i o tatou Pariha, ki te whakahaere Mihana awl'na, whakaako. Kia toru nei nga ra kia wha ranei, ki tena Pariha, ki tena Pariha.

Ka pa te mate ki te tamariki whanga'a ki te **Wood's Great Peppermint Cure.**

Na Wharetini Rangī rana ko P. H. Tomoana i tautoko. Whakaaetia ana.

19. Nga Whare-Mihana.

He nui nga korero mo tenei take, ara te nui rawa o te moni e pau ana ki aua whare. I runga i te tono a te Tiamana, hikitia ana tenei take mo te Hui Topu a te wa o te Hinota.

20. Te Wairoa.

I whakaatu a Rewi Tamihana, kua kore rawa he tangata hei hapai i te Hahi i Te Wairoa, i te kore Mimita mo tera Pariha. Nana tonu i mau he rarangi kohikohi i roto i ona hoa pakeha, a koia tenei nga moni ma koutou e kaute. Te kautetanga kitea ana te rahi o tana moni e £25 8s. Ka tono ia kia riihitia ki a ia te whenua o te Hahi hei tuunga mo te whare-mimita a tona wa. Ka homai ano e ia e £4 mo te tau. Ka eke ai tana moni ki te £29 8s.

He nui nga kupu mihi a te Hui mo te kaha o tenei kaumatua ki te manaaki i nga mahi o te whakapono. Ko tetahi wahi o tana moni mo Meranihia, ko te rahinga hei whakaea i tetahi wahi o te mama a Te Wairoa.

Misses Bulstrode.

I whakaatu a Peneti i tona whakaaro kia whakapuaretia he Mihana, ma nga Misses Bulstrode ki Te Wairoa. Kamui nga tamariki o Hukarere kei te Wairoa e noho ana. Ka 25 nga tau o enei wahine e noho ana hei kai-whakaaako mo Hukarere. Kua mutu ta raua ako i reira, engari ka mahi tonu raua i roto i te iwi Maori. Mehemea ka tu he whare e tika ana mo raua ki reira, tera pea raua e whakaaro mo taua take. Kua nui nga painga kua puta ki Porangahau.

Kaua rana hei puritia tonutia ki reira, itemea kua whiwhi ratou ki a Wharetini Rangī rana ko Rotu. Me aroha nga wahi kei te ngāikore. Kua hikitia tenei take mo te Hui Topu.

21. Mo nga kaute a te Tari Pihopatanga.

Na Peneti te motini, na Henare Hutana i tautoko:—Kia whakakorea atu i roto i nga kaute o nga Pariha te moni whakarite ma nga tamariki, i te mea ka uaua te hihiatia o nga Mimita tokonui nga tamariki, engari ka whai nga Pariha ko nga Mimita kore tamariki kia mama ai nga rarururu. Me whakahoki tenei take ki te Komiti Tumuaki o te Pihopatanga, me te tono atu ki a ratou, kia whakaritea tenei take i tetahi atu punga. Paahitia ana.

He mea whakamutu te hui ki te inoi.

P. PENETI,

e Secretary.

“ROPU MO TE AO HOU.”

(T. Wi Repa, M.B., Ch.B.)

He wa tenei e tika ana kia tiro-tirohia ano te ahua o ta fatau noho i te Ao nei. Kua hori te Ao tawhito kei muri kua riro oti atu. Kaore e hoki mai, kore, kore rawa atu. Kaati tatau te ko'ngō ki taua tupapaku. E ki ana a Te Karaiti! “Waiho te hunga mate kia tapuke i tona tupapaku.” Ko te ao ka haere tonu. Kaore e tu; kaore e hoki whakamuri. Kai te haere whakamua tonu. Kei roto tatau i te Ao Hou: Me pewhea tatau? Waiho te Ao Tawhito kia moe ana i tona moenga roa. Heoi ta tatau he

pupuri i nga mea papai o taua Ao hei oha ma tatau kia ia. a. ka tuku iho ki a tatau tamariki. E tika ana me whakahou te kaupapa o ta tatau noho i te Ao nei. No reira e karanga ana nga reo mararama o naianei, me whakaropu te Ao Hou. Tena, he aha te kaupapa mo taua Ropu o te Ao Hou?

Ko tooku whakaaro tenei mo taua Ropu.

1. He whakahuuhui i nga kaha mahi, i nga kaha matauranga, i nga kaha mahara o te Iwi e marara noa atu ra.
2. He tiroiro, ka whakahuuhui i nga whakahaere e korara noa atu ra, e korara noa atu ra.
3. He whakakotahi i nga tiroiro mo nga take e pa ana ki te Iwi i raro i enei wawabanga.
 - (a) Take o te ora;
 - (b) Take whakatiputipu i te Iwi;
 - (c) Take e pa ana ki nga kura;
 - (d) Take e pa ana ki nga matauranga nunu;
 - (e) Take whakaako i te Iwi;

Otira taua Ropu hei kai-hautu mo te Iwi i tenei wa.

KEI TE NGOIKORE TATAU.

He wa tenei no te Rererangi, no te korero takiwa, no nga kai-puke ruku moana, no te hiko, no te hokohoko, no te ahu whenua. Kei te pokaikaha noa iho tatau ki roto i te maru o enei mea. Kaore ano a tatau nei hoatutanga ki nga taonga nunui o te wa. Te tunanako atu ma te Ropu nei te Iwi e whakakorikori, kia ara ki runga. Nga kaha pakupaku kei a tatau, ma te Ropu nei e paihere kia neke haere ai ki te nui. He paku whenua kei a tatau e toe ana. Ma te Ropu nei nga ngoikore e tohutohu me pewhea te mahi e piki ai. Mo te taha ki a tatau kura Maori. He maha rawa nga haora o te ra e whakapau ana ki te mahi i nga mahi o waho. Ka pau noa iho te taima mo te ako ma te Ropu nei e whakaputa te whakahi topu a te Iwi ka whakarangona mai e te Tari Whakahaere o nga kura. Mo te taha ki nga kura pera i Te Aute, i Tipene, i Waerenga-a-hika, i Paerata, i Otaki, i Clarendon. Inaianei kaore i te uruatu te reo, me nga mahara o te Iwi ki nga whakahaere o enei kura. Ma te Ropu nei e tiroiro te ahua o enei kura. He maha rawa ranei enei kura mo te momo whakaako kotahi. E tika ana ranei me wehewehe a ratau kaupapa matauranga e whakaako ai. Me whakaiti iho ranei te maha o nga kura, ka hoatu i nga moni hei oranga mo nga mea e whiriwhiritia kia waiho. I te kore ropu o te Iwi, kaore tatau i te pa atu ki aua kura. Ano te ahua o aua kura he kura "pauweti" na tetahi ropu pakaha hei mahi moni ma ratau. Ahakoa pai te whakahaere o aua kura e tika tonu ana kia pa atu te Iwi nana nga taonga. Tetahi mahi tika ma te Ropu nei he tuku i tetahi tangata i etahi tangata ranei, ki te kauwhau haere ki te Iwi i aua kaupapa, hei whakaohoho i te Iwi. Mo te taha ki te ora o te Iwi, ki tooku whakaaro me tuku nga kaunihera marae hei whakahaere i tera taha.

Kaati ake enei whakamararama mo te aranga o te tahu o te whare e kia nei ko te Ropu mo te Ao Hou. Tena ma wai te karanga tuatahi.

“TE WAI-HAKIHAKI.”

(T. Wi Repa, M.B., Ch.B.)

He tino mate tenei no te Maori. Engari kaore e hemo ana te tangata ia ia. Heoi ano tona kino he maeneene, ka rakuraku kaore e reka te moe. He mate tenei e pa nui ana ki te kiri tamariki pakupaku. He kiri ngohe ngohe hoki to te tamariki, na reira ka tere tonu te tihorehorea e te purapura o te mate. He mate ano tenei no te Pakeha. Ina ra koi pohehe te tangata no te Maori anake te mate nei. Tona ingoa pakeha he “Scabies”. Te ingoa o te ngarara nana tenei mate i mahi ki runga i te kiri tangata he: ‘Acarus Scabiei,’ or ‘sarcoptes hominis’. I whakatu ake ai au i tenei mea kia marama ai ki a tatau, e hara i te Maori anake te iwi Kainga te kiri e te mate nei e te “Hakihaki”. Te mano tini o te pakeha e pangia ana e tenei mate.

HE MATE WHAKAPARAHAKO.

Ka pangia te tamaiti e te mate nei, ka ki nga matua: “Kei te pai; he wai-hakihaki noa hoki. Hei aha noa te kawe ki te takuta. He mate ora noa.” He whakaaro pohehe tenei. He mate kino tonu tenei. Ina ra tona mate he whakararuraru i te moe a te tamaiti. I te wa e iti ana te tamaiti, ara i te rua ka piki ake ki te tekau nga tau, te mea nui hei whaka wairakau i tona tipu he moe, ki te kore e au tona moe, kaore e pai tona tipu. Kaore e au tona moe no temea ka raraku tonu, a, tata noa te awatea. Oho rawa ake i te moe ka ngenge te tamaiti, kaore e mataara ki nga mahi o te awatea, ka raruraru tona kura. Ka tae ki tona pakeketanga, ka whakariharaha tona kiri. No reira he kohuru nga matua i a ratau tamariki e tukua nei e ratau kia ngaua ana e te hakihaki ia po ia po. Me mutu te whakaparahako ki te mate nei. Kitea ana kawe ana i te tamaiti kia kite te Takuta, te Neehi ranei.

TE PUTAKE O TE MATE NEI.

E kiia ake ra i runga ake nei, te putake o te mate nei he ngarara paku. Mehemea ka wawahia te inihi kia whitu tekau, kotahi o aua wahanga whitu tekau te roa o taua ngarara (1-70th of an inch). Engari ka kitea tonutia e te kanohi. Penei i te puta ngira nei te rahi. Ki te kore te ngarara nei kaore e tipu te wai-hakihaki. Tena ano te kai whaka-momona i taua tipu. Tera whakanomona he paru kei roto taua ngarara i te paru. Ki te paru te kiri o te tangata o te tamaiti ranei, ka ngoikore te kiri. Hei reira ka kaha taua ngarara ki te kari huarahi mona ki roto i te kiri tangata kia uru ki roto i te kiri, ka whakawhanau i ana heke. E rua heki i te rakotahi. I te ngarara nei e kari ana i tona huarahi ki roto i te kiri, ka maeneene te kiri, ka timata te raraku a te tamaiti. Kaati kaore e mutu te rakuraku kei raro ke hoki i te kiri te ngarara nei e huke ana. Na wai ra, ka pahore te kiri o tena wahi o tena wahi o te tangata e tukinotia ana e te ngarara nei ratau ko ana punua. Ka kitea te koha o te mahi a te ngarara nei, kinaki atu hoki ki te paru o te tinana, ka kiia kei te pangia tamaiti a mea e te Wai-hakihaki.

TOHU O TAUUA MATE.

Kaore pea he tangata pakeke i te tauhou ki tenei mate. Otira i te maha o nga mate o te kiri, he mea tika ano kia whakaatutia nga tohu o te mate nei. Ko te tino mate tenei o te kiri Maori. Timata ai te maeneene i te putake o nga ringaringa pakupaku (fingers). Ka rakurakuhia, ka puta te tara-wai, ka toto, ka pirau. Ka neke atu ki muri o nga ringa. Ka puta i nga keke, ka raraku i kona, ka maeneene ano i te whero nohanga nei. Ka raku-raku i kona. Ka raraku i muri i nga pona, tae atu ki nga waewae, ki raro hoki o nga waewae. Heoi ano te wahi e puta ko te kiri o te konohi o te mahunga hoki. Ko te wai-hakihaki tenei.

RONGOA.

He mate ngawari tenei ki te rongoatia. E mohiotia ana hoki tona putake. Ki te patua tana putake, ka ora te turoro. Te putake o te mate nei ko te ngarara kua whakahuatia ake ra, me tona hoa me te paru. Ka taea tenei tokorua te patu, ka ora ngawari noa te turoro. Te rongoa patu o te ngarara nei he ngawha. Te rongoa patu o te paru he wai, he hopi. Kei a tatau katoa enei taonga. Ina noa te huarahi ngawari o te mahi. Me whakakaukau te turoro ki roto i te tapu wai wera, ka ukui i tona kiri ki te hopi ngohe ngohe (soft soap). Kei nga toa tenei hopi. Te take o te whakakaukau nei, he horoi i te paru ka tahi, he whaka ngohe ngohe i nga kiri paka o runga i te mate kia ngawari ai te ma kerekere mai, ka rua. Ka watea nga mate i te kiripaka, katahi ano ka tika ki te pani ki te rongoa. Te rongoa he "sulphur ointment". Me "miki" te ngawha ki te hopi ngohe ngohe (soft soap), penei: E rua ti punu ngawha ki te tepere punu hopi-ngohe ngohe (soft soap). He pai tonu ki te "miki" i te ngawha ki te "vaseline." Kia rua tipunu ngawha kia kotahi tepere punu vaseline. Mo te taha tenei ki te tinana.

Mo te taha tenei ki nga kakahu o te tangata, tamaiti, mate ranei. Kei runga hoki i aua kakahu e pe ana, e piri ana te nga paku o te mate, me nga ngarara ano hoki. Mehemea he kareko he rinena, he kaone puru ranei nga kakahu o roto, me paera katia ena kia pau atu nga ngarara i te ahi te kai atu Kauaka nga kaka paruparu e whakakakahuatia i muri o te whakakaukauranga Kauaka rawa atu. Mehemea he parame, he kakahu wana ranei nga kaka, kaore e taea ena te paera Engari me ruirui he ngawha maroke ki roto i aua kaka ka whakawhata mo te kotahi wiki. Heoi muri i tena ka horoi ki te wai mahana. Ka maroke ka ruirui ano he ngawha maroke ki roto, ka purupuru. Mehemea ka tika te whai a te tangata i enei tohutehu, e tonu ano nga ra ka ora te mate me ruirui ano he ngawha maroke ki runga i nga parukete, i nga hiti ranei.

Mo te mare kaore he rongoa hei rite ki te **Wood's Great Peppermint Cure.**

He inoi tenei ki nga matua; kati te waiho i nga tamariki kia ngau ana e te mate weli nei e te wai-hakihaki.

KARO O TE MATE.

Mehemea ka horoia nga tinana ia ra, ia' ra, ki te wai ki te hopi, ahakoa waiwera, ahakoa wai matao, kaore e pangia e te mate nei. Tena i ana timata i naianei. He kainga whai wai a Niu Tireni. Manaakitia te wai, te hopi, kaore nga kiri o nga tamariki e ngaua kinotia e te haki haki.

“HE KOTAHITANGA MO TE AO HOU.”

(By P. H. Tomoana).

E, tika ana kia whaia nga korero a o tatou hoa i whakaohooho nei i a tatou i roto i te pepa o Mei me Hume kua hori tata ake nei. E tiki ake ana au ki nga kupu tchutehu a Takuta Wi Repa o Te Araroa me Tutepuaki o Turanga e tono nei kia pera tatou a e whakaaraara nei i a tatou kei moe. E tautoko ana ahau i enei tu whakaaraara kia noho mataara tatou.

Me pehea koa e taia ai e tatou te whakatutuki i era whakaarotanga? Ehara i te mea he tikanga hou tenei reo karangaranga i a tatou kia penoi. Ehara hoki i te mea kei te he tenei reo me enei mahara, kaore, ko te ahuatanga tenei o nga tama o te wa me tona reo katoa. Te Tumanako he taonga no te wa. Kua kite katoa tatou i te ahuatanga o te heke me te piki, o te rahi me te iti, o te ora me te mate, o te marino o te tupuhi, me era atu tu ahuatanga hei whakariterite i nga taha e rua o ia ahua o ia ahua, engari ko etahi i kite whanui a ko etahi i kite whaiti. Ko etahi i hikoi whakamua, ko etahi i pahoke whakamuri. Ko etahi i tika ko etahi i parori.

Ko etahi i apo ko etahi i makoha. Otira ko enei wahi e taia te whakariterite ina tikina i nga kaupapa o tetahi wahanga o tenei mea o te aroha ki te iwi. Na te aroha ka whakakotahi nga kaumatua i roto i o ratou nei ra, e kapi nei nga 'hahitoni' (history) i era korero.

Heoi taku e tiki atu ko Te Kotahitanga o nga tamariki o Te Aute Kareti, he tumanako no tatou e hoa ma me o tatou hoa kua wehe atu kia piki te iwi me nga ahuatanga i roto i nga reo karangaranga o te wa kia 'whitiki'. Ina tonu a Hone Teimana a Sir Ngata a Archdeacon Hawkins a Anaru Tiwaka nga "poi" na ratou i kawe tuatahi tenei tikanga ki te aroaro o to tatou kaumatua o Hone Tatana. i tautokona ai e ia me tatou katoa, a i muri o tena ko Te Kotahitanga o nga Kaumatua me ta ratou pepa i huaina ai ko 'Huia Tangata Kotahi! Kaore e taia te ki i he nga kaupapa i mate ranei te iwi i ana kaupapa. Engari me ki i moe taua i runga i te huamotanga o nga tai-whaka-te-maori. Otira kaore taua i te ware ki tenei whakatauki:—'E ara ana te mata-hi-taua, e moe ana te mata-hi-tuna'.

(Taria te roanga).